



Maniitsoq 20. august 2015
UKA 2015/106

Inatsisartut Suleriaasianni § 36 naapertorlugu apeqquteqaat tunngavigalugu oqallinnissamik imaattumik siunnersuuteqarpunga:

Kalaallisut oqaatsitta qanoq tusagassiutini nukittorsarneqarsinnaanerannik qaffassarneqarsinnaanerannillu apeqquteqaat aallaavigalugu oqallisissiaq.

(Inatsisartunut ilaasorta q Mimi Karlsen, Inuit Ataqatigiit)

Tusagassiutit tassaapput naalaarneqartut atuarneqartartullu pingaarnersaat, taamaammallu oqaatsinik atuineri sunniisarput inuppassuarnut. Tusagassiutini kalallisut oqaatsit, ilaatigut kukkusut atorneqaraangamik arlaleriarlutik atorneqarsinnaasarpur naqqinneqaratik, taamaammallu eqqortuunngikkaluartut atuartunit tusarnaartunilluunniit nalinginnaasutut isigineqalerlutik atorneqalersinnaasarlutik.

Taamaattumik pingaaruteqarpoq tusagassiutit oqaatsigut eqqortumik atuisarnissaat. Tusagassiutit kikkunnik tamanit tusaaneqartut maligassiuisussaapput oqaatsitta atorneqarnerinut. Taamatut oqarninni tusagassiutit kiffaanngissuseqarnerat qanorluunniit oqaaseqarsinnaanerannut apeqquusiiniangilanga

Kalaallisut oqaatsivut pisortatigoortumik oqaaseraagut pingaarnert. Oqaatsitta ineriartortuarnissaat isumagiuartariaqarparput, atortuarnerisigut oqalunnikkut allannikkullu. Oqaatsitta annertunerusumik atorneqarnermikkut inerikkiartornerunissaat periarfissaqarnerulissaaq. Assersuutigalugu oqaatsinik immikkut ilisimasalimmik atorfeqartitsinikkut allatigulluunniit aqqiissuteqarnikkut, kalaallisut oqaatsitta tusagassiorfinni eqqortumik atorneqartarnissaat pillugu siunnersuisartussamik ilitsersuisartussamillu aqutissiuussi-soqarsinnaappat taamaammatt tamanna pingaaruteqartuuvoq.

Tassunga tunngatillugu taasinnaavara Islandimi radio RUV atorfeqartitaqarmat Islandimiut oqaasiinut ilisimatumik, tusagassiutini oqaatsit atorneqartut pillugit nakkutilliillunilu siunnersuisinnaasumik.

Nunatsinni assingusumik aqqiissuussi-soqarsinnaappat taamaaliornikkut, soorlu oqaatsinik immikkut ilisimasallip nunatsinni tusagassiutit taakkualu kalaallisut oqaatsitsinnik atuinerat immikkut sammisarilersinnaassagaluarpar, minnerunngitsumillu oqaatsit atorneqartussat kukkuneqarpallaannginnissaat anguniarumallugu siunnersuillunilu ilitsersuisinnaassalluni tusagassiuteqarfiit kissaatigissappassuk.

Siunnersuut malillugu Kalaallit Nunatsinni tusagassiorfinni sulisunut pikkorissaasarnissat siunnersuisarnissallu aqutissiuunneqarsinnaanngussagaluarput, soorlu sulisut makku eqqarsaatigalugit: oqaasertalersuisartunut nutserisunullu, tusagassiorturnut aammalu tusagassiutini aqqiissuisunut taamatullu pisortani aammalu suliffeqarfinni namminersortuni tusagassiuutilerinemik avammullu tusarliisarnermik suliaqartunut.

Kalaallisut oqaatsitta siammarsarneranut eqqortumillu atorneqarnissaanut siuarsaanermi allanik periarfissaqarpoq. Uanilu pingaaruteqarpoq ingerlatsiviit pigeriikkagut ilisimasaasalu atorluarnissaat. Uanilu eqqarsaatigivara Oqaasileriffik kiisalu Oqaatsinik Pikkorissarfik.

Partiit allat tamanna pillugu qanoq isummersornissaat tusassallugu qilanaaraara. Naggataatigullu kaammattuerusuppunga oqaloqatigiinnitsinni inuiaqatigiit assigiinngitsut

oqaaseqatigiiaallu akornanni ungasinnerulersitsisumik pilersitsisoqassanngitsoq, kisiannili inuiaqatigiit katersuuffigisinnaasaattut isikkulimmik oqaloqatigiissalluta.

Inatsisartut oqaaseqaatissaattut siunnersuut:

Nunatsinni tusagassiutit eqqortumik kalaallisut oqaatsitsinnik atuinissaat pingaaruteqartog Inatsisartut isumaqarput.